

Sultan Abdülaziz Han'ın 25 Şubat 1863 tarihli İrade-i Seniyyesi



‘Atûfetlü, efendim hazretleri

Ma‘lûm-ı ‘âlî buyrulduğı üzere hazâinin umûr-ı hesâbiyesini rü'yet ve tedkîk için Dîvân-ı Muhâsebât nâm ve ‘unvânıyla bir hey'et teşkîl olunması tasavvur kılınarak bunun riyâsetine dahi otuz bin guruş ma‘aş tah- sîsile ‘atûfetlü Vefik Efendi Hazretleri ta'yîn buyrulmuş ise de hey'et-i mebhûsenin te'sîs ve teşkîli epeyce masrafa tevakkuf idüb öyle fevkal'âde ma‘aş ve masârifât vukû'unu ihtiyâra ise teşebbüs olunan tasarrufât ve tenkîhât nâ- müsâ'id olduğuna ve

Mâliye Nezâret-i Celîlesi cânibinden beyân ve ifâde kılındığı vechile Meclis-i Muhâsebe-i Mâliye ‘umûm-ı muhâsebâtın rü'yetine merci‘ ve mevki‘ olarak ânın ıslâhât-ı mukteziyyesi icrâ olunduğı halde dîvân-ı mezkûrun teşkîline hâcet olmayub bu dâhî sâye-i şevket-vâye-i hazret-i pâdişâhîde derdest-i mütâla‘a ve istîzân bulunduğuna ve bu kere Ticâret Nezâret-i Celîlesi'ne me'mûr buyurulan devletlü Edhem Paşa Haz- retleri'nin Meclis-i Vâlâ Kavânîn Dâ'iresi'nde olan yeri açık idiğüne mebnî cümle tasarrûfâtın olmak üzere ma‘aş-ı mezkûrdan onbeş bin guruş şehriye ile müşârûnileyh Vefik Efendi'nin dâ'ire-i mezkûre a'zâlığına me'mûr buyurulması ve diğere on beş bin guruşunun dahî derdest tanzîm ve takdîm olan tasarrûfât defterine ‘ilâveten Hazine-mânde ve meclis-i mezkûrun bir an evvel ıslâhıyla nezâret-i müşârûnileyhâ tarafından yapılacak karâr- nâmenin ‘arz ve ifâde ittirilmesi geçen gice akd olunan Encümen-i Mahsûs-ı Vükelâ müzâkerâtından bulunmuş olmağla ol bâbda emr ü fermân isâbet beyân hazret-i şehriyâri her ne sûretle müte'allik ve şeref-sudûr buyurulur ise anâ göre ifâ-yı muktezâsına ibtîdâr olunacağı beyânıyla tezkere-i senâveri terkîm kılındı efendim. Fî 5 N [Ramazan] sene 1279/ 24 Şubat 1863.

Ma'rûz-ı Çâker-i Kemîneleridir ki.

Resîde-i dest-i tevkîr olan iş bu tezkire-i sâmiye-i sadâret-penâhîleri manzûr-ı me'âlî-mevfûr-ı hazret-i pâ- dişâhî buyurulmuş ve istîzân-ı ‘âlî asafâneleri üzre ma‘aş-ı mezkûrdan on beş bin guruş şehriyye ile müşârûnileyh Vefik Efendi'nin dâ'ire-i mezkûre a'zâlığına me'mûr olunması ve diğere on beş bin guruşunun dahî defter-i mezbûra ilâveten hâzine-mânde ve meclis-i mezkûrun bir an evvel ıslâh ile nezâret-i müşârûnileyhâ tarafından yapılacak karâr-nâmenin ‘arz ve ifâde itdirilmesi müte'allik ve şeref-sudûr buyurulan emr ü irâde-i seniyye-i cenâb-ı mülûkâne muktezâ-yı münîfinden bulunmuş olmağla ol bâbda emr ü fermân hazret-i velîyyü'l-emrindir. Fî 6 N [Ramazan] sene 1279/25 Şubat 1863. **BOA, İ. DUİT**, Nu. 59/2.

